



uf em satellitebiud

Text und Melodie: Hans Jürg Zingg

Begleitung: Roland Scherrer/Christian Schwander

uf em satellitebiud
da isch aus geng haub so wiud
d ärde tschägget wi ne cloon
isch en uurige luftbaloon

d wäuder schtärben ihre tod
me gsehts schön dank infrarot
z russland dä reakterbrand
dasch soumässig intressant
d ärde bäbt in mexiko
gsehsch mit müej e schpur drvo
e vulkanusbruch mi dünkt
ds japan heigs zwe roti pünkt
taifun über florida
lue di wysse wirble da
schneesturm über kanada
gäu fasch wi d andromeda

uf em satellitebiud
da isch aus geng haub so wiud
d ärde tschägget wi ne cloon
leider geng sehr monoton

aber i de nächschte jahr
änderet viu wi wunderbar
ds biud wird wider intressant
s git mängs nöjs i mängem land
nordpol südpol ds ysch wird knapp
wyssi chappe schmelzen ab
langsam schtyge d wäutmeer a
mängi schtadt mues gloube dra
hongkong new york rotterdam
schecke töif im graue schlamm
ou ds venedig lige d ziegu
dütlech undrem wasserspiegu

zäh jahr speter lue wi tou
ganz italie gälb wi strou
d wüeshti schynt im vormarsch da
s gseht scho fasch us wi d sahara
und ou ds schwyzli lueg u schtuun
isch mehrheitlech wyss u bruun
so sy dert mir vermuetes küen
gly nume no di grüne grünen
waudbränd wüete lang u schträng
faszinierendi farbekläng
jura wallis u tessin
innerschwyz u ängadin

ungereinisch lueg itz da
füürwärch über usa
und ou russland isch so wyt
praktisch grad zur glyche zyt
explosion um explosion
ärdeschad het ds biud kei ton
blitze zünfte sunnehaft
itz hets ou europa gschafft
wyssi bluemchöhlwulke druuf
stygen i d stratosfären uf
grööileche näbubrei teckt lue
ds land uf em nördleche globus zue

uf em satellitebiud
da isch aus geng haub so wiud
d ärde chly anders tschägget itz
isch no guet für ne letschte witz

wüu uf beidne hemisfäre
das isch zimli schwär z erkläre
gsehts itz lang jahry jahrus
nach me sibirische winter us
speter vermuete mer nümm so küen
s syge nid emau me di grüne grünen
jede versuech vom mönsch sys läbe
wyterzvererbe syg vergäbe

trotzdäm sändet biud um biud
jede satellit wi wiud
aber niemmer isch me da
wo di biuder chönnt empfah

d satelliten u dr mond
kreisen um d ärde unbewohnt
u dr liebgott luegt ne zue
het itz wider rue

(1986)